

OFFERYNNAU STATUDOL CYMRU

2015 Rhif 539 (Cy. 46)

ARDRETHU A PHRISIO, CYMRU

Rheoliadau Ardrethu Annomestig (Dyfrffyrdd) (Cymru) 2015

<i>Gwnaed</i> - - - -	<i>4 Mawrth 2015</i>
<i>Gosodwyd gerbron Cynulliad</i>	
<i>Cenedlaethol Cymru</i> - -	<i>6 Mawrth 2015</i>
<i>Yn dod i rym</i> - -	<i>1 Ebrill 2015</i>

Mae Gweinidogion Cymru yn gwneud y Rheoliadau a ganlyn drwy arfer y pwerau a roddwyd i'r Ysgrifennydd Gwladol gan adrannau 64(3), 65(4) a 143(1) a (2) o Ddeddf Cyllid Llywodraeth Leol 1988 (1) ac a freiniwyd bellach ynddynt hwy(2).

Enwi, cychwyn a chymhwyso

1.—(1) Enw'r Rheoliadau hyn yw Rheoliadau Ardrethu Annomestig (Dyfrffyrdd) (Cymru) 2015 a deuant i rym ar 1 Ebrill 2015.

(2) Mae'r Rheoliadau hyn yn gymwys o ran Cymru.

Dehongli

2. Yn y Rheoliadau hyn mae cyfeiriad at Canal & River Trust yn gyfeiriad at y cwmni sy'n gofrestredig o dan yr enw hwnnw ar yr adeg y mae'r Rheoliadau hyn yn dod i rym(3).

Hereditamentau dyfrffyrdd

3.—(1) Yn yr achosion a ragnodir ym mharagraff (2) mae'r hereditamentau a fyddai'n fwy nag un hereditament heblaw am y Rheoliadau hyn, yn cael eu trin fel un hereditament.

(2) Yr achosion y mae paragraff (1) yn cyfeirio atynt yw hereditamentau y mae Canal & River Trust yn eu meddiannu, neu os nad ydynt yn cael eu meddiannu, yn berchen arnynt—

(a) sy'n—

(1) 1988 p. 41. Diwygiwyd adran 143(2) gan adran 139 o Ddeddf Llywodraeth Leol a Thai 1989 (p. 42) a pharagraffau 72 a 79(3) o Atodlen 5 iddi.

(2) Trosglwyddwyd pwerau'r Ysgrifennydd Gwladol, o ran Cymru, i Gynulliad Cenedlaethol Cymru gan Orchymyn Cynulliad Cenedlaethol Cymru (Trosglwyddo Swyddogaethau) 1999 (O.S. 1999/672). Trosglwyddwyd swyddogaethau Cynulliad Cenedlaethol Cymru i Weinidogion Cymru o dan adran 162 o Ddeddf Llywodraeth Cymru 2006 (p. 32) a pharagraff 30 o Atodlen 11 iddi. Mae adran 146(3) o Ddeddf 1988 yn darparu bod "prescribed", yng nghyd-destun rheoliadau, yn golygu wedi ei ragnodi gan y rheoliadau.

(3) Mae Canal & River Trust yn gwmni cyfyngedig drwy warant a luniwyd ac a gofrestrwyd o dan Ddeddf Cwmnïau 2006 (p. 46).

- (i) dyfrffyrdd (gan gynnwys toriadau a chwlfertau, lociau, clwydi, llifddorau, pypiau, falfiau rhyddhau llif, dyfrffyrdd bwydo, sianelau, coredu, pyllau ochr, ffosydd a draeniau);
 - (ii) dyfrbontydd, basnau, pontydd, argloddiau, argaeau a thwnelau;
 - (iii) goleudai, goleufeydd, bwiau, torddyfroedd, liffitiau cychod a strwythurau eraill sydd wedi eu dylunio i hwyluso mordwyaeth;
 - (iv) dociau, ceiau, pierau, glanfeydd, pontynau, angorfeydd, llithrfeydd, tir ac adeiladau a ddefnyddir ar gyfer adeiladu a chynnal a chadw badau neu storio badau ar ddŵr, neu ar gyfer darparu, cynnal a chadw neu wasanaethu dyfrffyrdd mewndirol a chyfarpar neu beiriannau a ddefnyddir mewn cysylltiad â hynny;
 - (v) pyllau clai, tipiau treillio neu dipiau gwaredu gwastraff eraill; neu
 - (vi) tir, adeiladau neu strwythurau eraill neu rannau o adeiladau neu strwythurau a ddefnyddir i ddarparu neu wasanaethu cyfleusterau ar gyfer mordwyo ar ddyfrffyrdd mewndirol, mynediad y cyhoedd iddynt a'u mwynhad ohonynt, neu at ddibenion ategol; a
- (b) nad ydynt yn hereditamentau a eithrir.
- (3) Ym mharagraff (2) ystyr "hereditament a eithrir" yw unrhyw hereditament—
- (a) sy'n ymgymeriad doc neu harbwr, neu'n cynnwys ymgymeriad o'r fath, a gynhelir o dan awdurdod a roddir gan unrhyw ddeddfiad, neu oddi tani;
 - (b) sy'n fangre a roddir ar osod yn y fath fodd fel ei bod yn bosibl ei hasesu ar wahân;
 - (c) sy'n fangre a ddefnyddir yn gyfan gwbl neu'n bennaf fel mangre swyddfa, pan nad yw'r fangre honno wedi ei lleoli ar dir gweithredol Canal & River Trust; neu
 - (d) sy'n faes parcio a ddefnyddir yn gyfan gwbl neu'n bennaf mewn cysylltiad â mangre swyddfa, pan nad yw'r fangre honno wedi ei lleoli ar dir gweithredol Canal & River Trust.
- (4) Mae'r hereditament a ddisgrifir ym mharagraff (1) yn cael ei drin fel hereditament—
- (a) a feddiennir gan Canal & River Trust; a
 - (b) a leolir yn ardal Cyngor Bwrdeistref Sirol Wrecsam.

4 Mawrth 2015

Leighton Andrews
Y Gweinidog Gwasanaethau Cyhoeddus, un o
Weinidogion Cymru

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn darparu bod eiddo penodol y mae Canal & River Trust yn ei feddiannu, neu os nad yw'n cael ei feddiannu, yn berchen arno, i'w drin fel hereditament unigol at ddibenion ardrethu annomestig. Mae hefyd yn darparu bod Canal & River Trust i'w drin fel meddiannwr yr hereditament a'i fod i'w drin fel hereditament sydd wedi ei leoli yn ardal Cyngor Bwrdeistref Sirol Wrecsam.

Mae Canal & River Trust yn gwmni cyfyngedig drwy warant a ffurfiwyd ac a gofrestrwyd o dan Ddeddf Cwmnïau 2006 (p. 46). Trosglwyddwyd swyddogaethau statudol Bwrdd Dyfrffyrdd Prydain, a oedd yn arferadwy mewn perthynas â Chymru a Lloegr, i Canal & River Trust gan Orchymyn Bwrdd Dyfrffyrdd Prydain (Trosglwyddo Swyddogaethau) 2012 (O.S. 2012/1659). Trosglwyddwyd eiddo, hawliau a rhwymedigaethau penodol Bwrdd Dyfrffyrdd Prydain i Canal & River Trust gan Gynllun Trosglwyddo Bwrdd Dyfrffyrdd Prydain 2012 a wnaed o dan Ddeddf Cyrff Cyhoeddus 2011.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, paratowyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth yr Is-adran Cyllid Llywodraeth Leol a Pherfformiad Gwasanaethau Cyhoeddus, Llywodraeth Cymru, Parc Cathays, Caerdydd CF10 3NQ.